

## **AURKIBIDEA**

<b>Abenduaren 25ean, JAUNAREN JAIOTZA .....</b>	<b>4</b>
<b>Abenduaren 31n, FAMILIA SANTUA .....</b>	<b>21</b>
<b>Urtarrilaren 1ean, JAINKOAREN AMA MARIA.....</b>	<b>29</b>
<b>Urtarrilaren 6an, JAUNAREN AGERKUNDEA .....</b>	<b>36</b>
<b>Urtarrilaren 7an, JAUNAREN BATAIOA.....</b>	<b>45</b>

## Abenduaren 25ean **JAUNAREN JAIOTZA**

### **Agurra**

Gu salbatzeko jaio den Kristogan agertu zaigun Jainko gure Aitaren bakea eta maitasuna zuekin.

### **Sarrerako Oharpena**

Pozik gaude gaur: Jainkoa-gurekin da, gure arteko egin da, gu Bere arteko egiteko.

Bera da gu argitzen gaituen zuzentasun eguzkia, herri guztiei bidea agertzera etorria. Onar dezagun, ospa dezagun, gora dezagun!

*(Oharpenaren orde, nahiago bada, egin daiteke beste sarrera hau "kalenda" zaharraren erara emana).*

Senideok, berri on bat, herri guztiarentzat poz handi bat, iragartzen dizuegu; pozkarioz entzun ezazue. Milaka urte igaro ziren, hasieran, Jainkoak zerua eta lurra sortu eta gizakia bere antz-irudira egin zuenetik; eta milaka urte uholdea atertu eta Goi-goikoak, itunaren eta bakearen seinale, ortzadarra distirarazi zuenetik; Erroma hiriaren eratzearen 752garren urtean, Octavio Augustoren menpeko 42garren urtean, lur osoan bakea nagusi zenean, munduaren seigarren adinean, orain 2023 urte, Erromatarren menpean zegoen Israelgo herri xume den Judako Betleemen, aska batean, ostaturik ez zutelako, Daviden jatorrikoa zen Joserren emazte Maria Birjinagandik, Jesus jaio zen; betiereko Jainkoa, betiereko Aitaren Semea eta egiazko gizona; Mesias eta Kristo zeritzana, gizakiek itxaron zuten Salbatzailea. Berari aintza eta gorespen gizaldi eta gizaldietan. Amen.

## Damu-otoitza

Jaunak agertu digu bere erruki handia Semea gure artera bidaltzean. Dohain miresgarri hori eskertuz aitor dezagun bekatari garela.

—Jesus Jauna, Mariagandik jaio eta gure senide egin zinen Jainkoaren Semea: erruki, Jauna.

—Jesus Jauna, gure ahuleriak ezagutzen eta maitasunez ulertzen dituzun Gizonaren Semea: Kristo, erruki.

—Jesus Jauna, gu guztiokin familia bat bera egiten duzun Aitaren Lehen Semea: erruki, Jauna.

Erruki dakigula Jainko guztiz ahalsua, eta, gure bekatuak barkaturik, eraman gaitzala betiko bizira. ✠. Amen.

## Aintza

Kanta dezagun pozez beterik Eliza osoarekin, aingeruek gau santu hartan Betleemen abestu zuten bezala: «Aintza zeruetan».

## Otoitza

*(Bezpera-arratsaldeko Meza)*

Salbamenaren esperantza pozgarri  
urtero gure bihotzean suspertzen duzun Jainkoa,  
egizu, zure Seme bakarra gu salbatzera datorrenean  
pozik onartzen dugun bezala,  
gu epaitzera etorriko denean ere  
har dezagula uste osoz.

Zurekin eta Espiritu Santurekin batean

Jainko eta errege bizi baita gizaldi eta gizaldietan. ✠. Amen.

*(Gauerdiko Meza)*

Egiazko argiaren distiraz argitu duzu, Jauna, gau santu hau;  
egizu,

lur honetan gertakari honen argi distiratsua ikusi dugunok  
goza dezagula zeruan haren aintzaren ederra.

Zurekin eta Espiritu Santurekin batean

Jainko eta errege bizi baita gizaldi eta gizaldietan. ℞. Amen.

*(Goizeko Meza)*

Jainko ahalguztiduna,

haragi egin den zure Hitzaren argi berriak bete gaitu;

egizu, gure bihotzetan argi egiten duen fedea

distira dezala gure egintzetan ere.

Zure Seme Jesu Kristo gure Jaunaren bitartez,

Zurekin eta Espiritu Santurekin batean

Jainko eta errege bizi baita gizaldi eta gizaldietan. ℞. Amen.

*(Eguneko Meza)*

Oi Jainko, era miragarrian moldatu duzu giza duintasuna

eta era miragarriagoan eraberritu;

egizu, gizatasunean gurekin bat egin duen zure Semeak

bat egin gaitzala berekin jainkotasunean.

Zurekin eta Espiritu Santurekin batean

Jainko eta errege bizi baita gizaldi eta gizaldietan. ℞. Amen.

### **Hitzaren liturgiari oharpena**

Gizaldietan isilik egondako Hitza, Profetek fedez itxarondakoa, Maria Birjinagandik jaio zaigun Kristo da. Bera da artzainei agertua; Bera, herri guztiei adierazia; Bera Elizak pozkarioz altxor bezala gorde eta hots egiten duen salbamenezko Hitz bizia. Entzun dezagun arretaz.

*Gauerdiko, Goizeko eta Eguneko Meza ospatzen denean, Irakurgaiak har daitezke hiru Mezatarako emandakoen artetik. Bezpera arratsaldeko Meza ospatzean, bertan egongo den jendeak hori izango badu Eguberri-Meza bakarra, egokiago gerta daiteke 25erako ematen diren hiru ebanjelioetako bat hartzea. Hemen, lau meza horietako testuak eskaintzen ditugu.*

(BEZPERA-ARRATSALDEKO MEZA)

### **Lehenengo irakurgaia** (Is 62, 1-5)

Isaias Profetaren liburutik

Sionen maitasunez ez naiz isilduko, Jerusalem maitasunez ez naiz geldi egongo; haren garaipena goiz-argia bezala agertu arte, haren salbamenak zuziak bezala distiratu arte.

Eta ikusiko dute herriek zure garaipena, errege guztiek zure ospea; izen berria ezarriko dizute, Jaunak berak emana. Koroa eder izango zara Jaunaren eskuan, errege-diadema zeure Jainkoaren eskuan.

Ez dizute berriz deituko «Zapuztua», ezta zure lurraldeari ere «Hondatua». «Ene atsegina» deituko dizute zuri, eta «Emazte» zure lurraldeari. Atsegin izango baitu zugar Jaunak eta emaztetzat hartuko du zure lurraldea.

Mutila neskatzarekin ezkontzen den bezala, hala ezkontuko da zurekin zure eraikitzailea; senarra emaztearekin pozten den bezala, hala poztuko da zurekin Jainkoa.

### **Erantzun-salmoa** (Sal 89 [88], 4-5. 16-17. 27 eta 29)

Jau - na, zu - re mai - ta - su - na a - bes - tu - ko dut  
 be - ti - ren be - ti.



- ∞. Ituna egin dut neure hautatuarekin,  
David neure morroiari zin eginez:  
«Sendo ezarriko dut betiko zure errege-jatorria,  
menderen mende eraikiko zure errege-ge-aulkia». ∞.
- ∞. Zorionekoa, Zu pozik goersten dakien herria!  
Zure argitan ibiliko da, Jauna;  
zure izenean da egunero alaitzen,  
zure salbamen-egintzaz harrotzen. ∞.
- ∞. Hark dei egingo dit: «Zu nire aita,  
nire Jainkoa, nire harkaitz salbatzailea».  
Beti gordeko diot neure maitasuna,  
sendo eutsiko harekin dudan itunari. ∞.

### **Bigarren irakurgaia** (Eg 13, 16-17. 22-25)

Apostoluen Eginak liburutik

Paulo Pisidiako Antiokiara iritsi zen eta, hango sinagogan sartuz, zutitu eta isiltzeko keinu eginda, hitz egin zien: «Israeldarrok eta Israelen Jainkoa gurtzen duzuen guztiok, entzun: Israel herri honen Jainkoak gure aurrekoak aukeratu zituen eta herria ugaritu zuen, Egipton arrotz zirelarik, eta bere besoaren indar handiaz atera zituen handik.

Gero, David eman zien errege, honetaz aitormen hau eginez: "Aurkitu dut David, Jeseren semea, nire gogoko gizona, nik nahi guztia beteko duena".

Hitzemana zuenez, honen hazitik atera zion Jainkoak Israeli Salbatzailea: Jesus. Hau etorri baino lehen, Joan Bataiatzaileak

bihotz-berritzeko bataioa hots egin zion Israel osoari. Eta bere bizitza bukatzera zihoanean, honela zioen Joanek: "Ez naiz ni zuek uste duzuen; badator nire ondoren beste bat, eta ni ez naiz inor haren oinetakoak askatzeko ere"».

## Aleluia

A - le-lu - ia, a - le-lu - ia, a - le-lu - ia, a - le-lu - ia.

℣. Bihar ezereztua izango da lurreko gaiztakeria; eta munduaren Salbatzailea **izango** da gure **erregea**. ℟.

**Ebanjelioa** (*Mt 1, 1-25 edota, laburrago, Mt 1, 18-25*)

(GAUERDIKO MEZA)

**Lehenengo irakurgaia** (*Is 9, 2-4. 6-7*)

Isaias Profetaren liburutik

Ilunpean zebilen herriak argi handia ikusi zuen; herio-itzalean bizi zirenei distira egin zien argiak. Gehitu zenuen poza eta handitu atsegina; pozetan dabilta zure aurrean, uzta biltzean izaten den pozez, harrapakinak banatzean izaten den atseginez. Apurtu baituzu lepoan zeramaten uztarri astuna, zapaltzailearen aginte-makila, Madiango gudarostea apurtu zenuen bezalaxe. Suak erreko ditu eta erraustuko lurra danbadaka zapaltzen zuten gudari-botak eta odolez zikinduriko jantziak.

Haurra jaio zaigu, semea eman zaigu; hari eman zaio aginpidea, eta haren izena Kontseilari harrigarri, Jainko indartsu, Aita betiko,

Errege bake-emaile. Handia izango da haren aginpidea, amairik gabekoa bakea Daviden tronuan eta haren erreinuan; sendo egingo da eta zuzenbidean eta justizian oinarrituko, gaurdanik eta betidaino. Jaun ahalguztidunaren maiteminak egingo du hau.

**Erantzun-salmoa** (*Sal* 96 [95], 1-2a. 2b-3. 11-12a. 12b-13)

Gaur ja - io zai - gu Sal - ba - tzai - le - a Kris - to, gu - re

Jaun e - ta Ja - be - a

- ∞. Kanta Jaunari kantu **berria**,  
kanta Jaunari, lur **oso**a,  
kanta Jaunari, bedeinkatu haren **izena**! ∞.
- ∞. Hots egin egunez egun salbatzai**le** dela.  
Zabaldu haren ospea nazi**o**etan,  
haren mirariak herri guz**ti**etan. ∞.
- ∞. Poztu bedi zerua, alai**tu** lurra,  
egin beza orro itsasoak eta bertako **guz**tiak,  
egin festa landa zabalak eta bertan den **guz**tiak. ∞.
- ∞. Egin poz-oihu, basoko zuhaitz **guz**tiok,  
Jaunaren aurrean, badat**or** eta,  
badator lurra epaitzera. ‘  
Justiziaz epaituko du **mun**dua  
eta leialtasunez **her**riak. ∞.



**Bigarren irakurgaia** (*Tt 2, 11-14*)

San Paulo Apostoluak Titori egindako gutunetik

Anaia maitea: Agertu da Jainkoaren onginahia, gizon-emakume guztien salbamenerako. Salbamen honek Jainkorik gabeko bizitzari eta munduko grina txarrei uko egiten irakasten digu, eta neurritz, zuzentasunez eta jainkozaletasunez mundu honetan bizitzen, gure itxaropen zorionsua noiz beteko zain, Jesu Kristo Jainko handia eta gure salbatzailea aintzaz beterik noiz agertuko zain. Hark bere burua eman zuen gugatik, gu gaiztakeria guztietatik askatu eta garbi egiteko, haren herri berezi izan gaitezen, on egin zale.

**Aleluia** (*Lk 2, 10-11*)

A - le-lu - ia, a - le-lu - ia, a - le-lu - ia, a - le-lu - ia.

℣. Poz handia sortuko duen **berri** ona iragartzen **di**zuet: Salbatzailea, Mesias Jauna, jaio **zai**gu gaur! ℟.

**Ebanjelioa** (*Lk 2, 1-14*)

(GOIZEKO MEZA)

**Lehenengo irakurgaia** (*Is 62, 11-12*)

Isaias Profetaren liburutik

Hona zer adierazten duen Jaunak lurraren azken mugetaraino: «Esan Sion hiriarri: Hara, badator zure salbatzailea; berekin dakar garaipen-

agiria, berak askaturiko herria. "Herri santu" deituko diote, "Jaunak askatua". Eta zuri, Jerusalem, "Hiri desiratu" deituko dizute, "Zapuztu gabeko hiri"».

### Erantzun-salmoa (Sal 97 [96], 1 eta 6. 11-12)

Hi - tza ha-ra - gi e - gin zai - gu. Gu - re - an Ha-  
ren bi - zi - le - ku.

∞. Errege da Jauna! Alai **bedi** lurra,  
poztu bitez uharte **ugariak**!  
Zeruek haren salbamen-egintza iragartzen **dute**,  
herri guztiek haren ospea **a** ikusten. ∞.

∞. Argia sortzen da zintzo**a**rentzat,  
poza bihotz zuzeneko**entzat**.  
Poztu zaitezte Jaunarekin, zint**zook**,  
goretsazue, haren santutasuna **gogoratuz**. ∞.

### Bigarren irakurgaia (Tt 3, 4-7)

San Paulo Apostoluak Titori egindako gutunetik

Anaia maitea: Jainko gure salbatzailearen bihotz ona eta onginahia agertu denean, salbatu egin gaitu; ez guk egindako zuzenbidezko egintzengatik, bere errukiagatik baizik, jaiotza berria ematen duen garbikuntzaz eta Espiritu Santuak eragiten duen berrikuntzaz. Espiritu hori oparo isuri digu Jainkoak, Jesu Kristo gure salbatzailearen

bitartez. Horrela, onginahi hutsez Jainkoak zuzen egin gaituelarik, itxaro dugun betiko biziaren oinordeko egin gara.

### Aleluia (Lk 2, 14)

A - le-lu - ia, a - le-lu - ia, a - le-lu - ia, a - le-lu - ia.

∞. Aintza zeruetan Jainkoari  
eta bakea lurrean haren gogoko gizon-emakumeei. ∞.

### Ebanjelioa (Lk 2, 15-20)

(EGUNEKO MEZA)

### Lehenengo irakurgaia (Is 52, 7-10)

Isaias Profetaren liburutik

Bai ederrak direla mendi gainetan albistariaren oinak! Bakea aldarrikatzen du, zorionaren berri ona ematen eta salbamena iragartzen! Sioni diotso: «Zure Jainkoa errege da!» Entzun zeure zaintzaileen oihua! Oihuka ari dira, poz-irrintzika, guztiak batera, beren begiz ikusten baitute Jauna Sionera itzultzen.

Ekin poz-oihuka guztiok batera, Jerusalemgo horma eroriok, Jaunak bere herria kontsolatu baitu eta askatu du Jerusalem. Herri guztien aurrean erakutsi du Jaunak bere beso santuaren indarra, eta munduko bazter guztiek ikusiko dute gure Jainkoaren salbamena.

**Erantzun-salmoa** (*Sal* 98 [97], 1. 2-3ab. 3c-4. 5-6)

I - ku - si du - te lur mu - ga de - nek gu - re Jain - ko -  
 a - gan - di - ko ga - rai - pe - na.

- ∞. Kanta Jaunari kantu **berria**,  
 egintza harrigarriak egin **baititu**;  
 garaipena eman dio bere **eskuin**ak,  
 bere beso **santu**ak. ∞.
- ∞. Bere garaipena ezagutarazi **du** Jaunak,  
 bere salbamen-egintza agertu nazioen **aur**rean.  
 Ez da ahaztu bere maita**tasun**az,  
 Israel herriari dion leial**tasun**az. ∞.
- ∞. Munduko bazter guztiek ikusi dute  
 gure Jainkoaren gara**rai**pena.  
 Egin irrintzi Jaunari, lur **oso**a,  
 egin poz-oihu eta kantu, jo **soin**ua. ∞.
- ∞. Ospatu Jauna **zitar**az,  
 zitaraz eta kantu-hotsez,  
 turutaz eta **adar**-hotsez;  
 egin irrintzi errege den **Jau**nari. ∞.

**Bigarren irakurgaia** (*Heb* 1, 1-6)

Hebrearrei egindako gutunetik

Askotan eta era askotara hitz egin zien antzina Jainkoak profeten bidez gure arbasoei; azkenak diren egun hauetan, berriz, bere Semearen bidez hitz egin digu. Seme hau egin zuen gauza guztien oinordeko, egin ere honen bidez egin baitzuen mundua.

Seme hau da Jainkoaren aintzaren distira eta Jainkoaren izatearen irudia. Honek eusten die gauza guztiei bere hitz indartsuaz. Eta, bekatuen garbikuntza egin ondoren, Jainko handiaren eskuinaldean eseri zen zeru-goienetan, aingeruak baino gorago jarria, ondareztat jaso zuen izena ere haiena baino goragokoa denez gero.

### Aleluia



∇. Argitu du egun **santua**;  
zatozte, herriok, gurtu ezazue Jauna;  
argi handia jaitsi da gaur **lurrera**. ∇.

**Ebanjelioa** (*Jn 1, 1-18 edota, laburrago, Jn 1, 1-5. 9-14*)

### Homiliarako argibideak

1. Hizkuntza bat ikasteko orduan, aditzak dira gauzarik zailenetako bat, baita ama-hizkuntza ikasteko orduan ere. Horiek gabe, zaila da diskurtso baten zentzua ulertzea, beste norbaitek esan nahi diguna, alegia. Hitz solteek ezer gutxi esaten digute, edo ia ezer ez. Asmatu egin behar dugu. Ekintza bat edo gauzekiko edo pertsonetikiko harreman-egoera bat adierazten digun diskurtsoaren zatia da aditza. Aditzaren bidez, ezagutu edo adierazi nahi dugunaren arteko harreman hori ulertzen ikasten dugu. Orainaldia, iragana edo

etorkizuna den. Lortu nahi duguna egiteko baldintzaren bat dagoen. Gehiago ikasten dugu bizitzarekin, gramatika-arauekin baino, harik eta erabilerarekin eta praktikarekin aditza jokatzeko ikasten dugun arte.

2. Ez da erraza bizitzaren zentzua ulertzea. Nondik gatozen galdetzen diogu geure buruari, nora goazen, heriotzaren ondoren zer dagoen. Erantzun kontrajarri asko eskaintzen zaizkigu, eta ez gaituzte asebetetzen. Entzun berri dugun ebanjelioak interpretatzeko gakoa ematen digu: Jesus Hitza da, hitz guztien sustraia, hurbiltzea eta bizitzaren zentzuaz zerbait ulertzea ahalbidetzen diguna. Hark sortu zuen dena, Harentzat sortu zuen, eta Harengan dago dena. Aitaren Hitza, argitu mundu honetako iluntasuna. Aitaren sekretuak jakinarazi dizkigu; Jainkoaren seme-alaba bihurtu gaitu, maite gaituelako sortu gaitu Jainkoak, maite gaituelako egin da gizon, eta maite gaituelako garamatza betiko patu batera. Hitz horrekin esaldi guztiak ulertzen dira. Harekin, Gurutzeko San Joanek dioen bezala, dena esan digu Aitak, eta jada ez dugu ibili behar gauzak ikuspen edo errebelazioen bidez jakin nahian.

3. Berri on hori jaso dugunok besteei ezagutarazi behar diegu, lekukotasunaren eta iragarpenaren bidez. Gu ere haztamuka ibiltzen gara askotan, baina Hitzaren argitasunak bidea galtzea eragozten digu. Eskatzen digun orori gure itxaropenaren arrazoa ematen jakin behar dugu, askok hitz gakoa ikas dezaten, oinazea sortzen dieten galdera existentzialei erantzuna aurkitu ahal izateko. Kristok, Hitz haragituak, Hark ekarri eta hizkuntza ulergarrian, gure giza hizkuntzan, jakinarazi zigun berri on hori besteei iragartzera bidaltzen gaitu. «Hitza gizon egin zen eta gure artean bizi izan zen».

## Jainkoaren herriaren otoitza

Fedez beterik bat egin dezagun, senideok, mundu zabaleko kristau guztiakin eta egin dezagun otoitz Kristoren jaiotzaz hasitako salbamena lurraren bazter guztietara iritsi dadin:

*Erantzuna:* ✠. **Erakuts guri, Jauna, zure bihotza ona.**



E-ra kuts gu ri, Jau- na, zu - re bi-hotz o - na.

- Eguberriaren misterioa alaitasunez ospatzen ari diren Elizaren seme-alaba guztiak jaio daitezela justiziazko, maitasunezko eta bakezko bizi berri batera. Egigun otoitz. ✠.
- Gizaki guztiak Kristo, Jauna, ezagutzera hel daitezen eta Bere inguruan betiko bil daitezen, galduta zeudenak bilatzera eta salbatzera etorria denez. Egigun otoitz. ✠.
- Gure giza izatea hartu zuen Jainkoaren Semea izan dadila negar egiten dutenentzat poz, gaixoentzat osasun, hiltzorian daudenen babes eta egun hauetan bakarrik eta triste daudenentzat goiko indar. Egigun otoitz. ✠.
- Jai hauetan elkartzen diren gure familietan haz dadin, Jesus, Jainkoaren Seme eta gure Salbatzailearenganako fedea. Egigun otoitz. ✠.

Jesu Kristo Jauna, Eguberriaren misterioaren bidez giza familiaren nekeak eta mugak zeure egin dituzu; entzun Zure Elizaren otoitza eta egizu sinets dezagula Aita eta Zu ezagutzeak dakarrela guztiontzat betiko bizia. Errege bizi baitzara gizaldi eta gizaldietan. ✠. Amen.

## Oparigaien gaineko otoitza

*(Bezpera-arratsaldeko Meza)*

Jauna, zeure Semearen jaiotza ospetsuarekin  
eman diozu hasiera gure salbamenari;  
emaiozu zeure herri honi  
misterio santu hauek maitasunik handienaz ospatzeko grazia.  
Jesu Kristo gure Jaunaren bitartez. ℟. Amen.

*(Gauerdiko Meza)*

Izan bekizu atsegin, Jauna,  
Eguberri-gau santu honetan egiten dizugun oparia;  
eta gure dohainak sagaritzen dituen  
harreman santu honen bidez,  
egin gaitzazu zeure Semearen izaera bereko,  
harengan bat egin baikaituzu Zeurekin.  
Errege bizi baita gizaldi eta gizaldietan. ℟. Amen.

*(Goizeko Meza)*

Izan bitez, Jauna, gure eskaintzak  
gaur ospatzen dugun  
Jesusen jaiotzako misterioaren neurrikoak,  
zure Semea gizon egina eta, aldi berean, Jainko dena  
agertu diguzun bezala,  
lurreko gure dohain hauek  
eman diezazkigutela jainkozko ondasunak.  
Jesu Kristo gure Jaunaren bitartez. ℟. Amen.

*(Eguneko Meza)*

Onartu, Jauna, gaurko Eguberri-festaburu honetan,  
Zurekin adiskidetzen gaituen oparia,  
hau baita gizakiak Zuri eskain diezazukeen  
gorespenik bikainena.  
Jesu Kristo gure Jaunaren bitartez. ℟. Amen.



**Prefazioa: Eguberritako I. Prefazioa.** (*Meza-liburua: 472. or.*)

### **Jaunartze-ondorengo otoitza**

*(Bezpera-arratsaldeko Meza)*

Janari-edari santuak eman dizkiguzu, Jauna,  
sakramentu honetan;

egizu, indarberri gaitzela zure fededunok  
zure Semearen jaiotza ospatuz.

Jesu Kristo gure Jaunaren bitartez. *℟̄.* Amen.

*(Gauerdiko Meza)*

Pozez gainezka ospatzen dugu, Jainko gure Jauna,  
Kristo gure Salbatzailearen jaiotza;

emaguzu santuki bizitzea, harekin bete-betea bat egiteko.  
Errege bizi baita gizaldi eta gizaldietan. *℟̄.* Amen.

*(Goizeko Meza)*

Poz handiz ospatu dugu, Jauna, zure Semearen jaiotza;  
emaguzu misterio honen muina fedez sakontzea

eta maitasun handi eta emankorrez bizitzea.

Jesu Kristo gure Jaunaren bitartez. *℟̄.* Amen.

*(Eguneko Meza)*

Jainko errukitsua,

gaur jaio den munduaren Salbatzaileak

Jainkoaren seme-alaba bihurtzen gaituen bezala,

egin gaitzala hilezko ere.

Errege bizi baita gizaldi eta gizaldietan. *℟̄.* Amen.

## Bedeinkapen Nagusia

Jauna zuekin. *℟̄*. Eta zure espirituarekin.

Makurtu burua Jaunaren bedeinkapena hartzeko.

*(Eskuak herriaren gain zabalik bedeinkapena esango du:)*

Jainko guztiz onak, bere Semea gizon egitearekin,  
uxatu ditu munduko ilunpeak,  
eta Maria Birjinagandik jaiotzearekin  
argitu [gau] egun santu hau:  
uxa ditzala berak zuengandik bekatuaren ilunpeak  
eta zuen bihotzak bere graziaren distiraz argitu. *℟̄*. Amen.

Kristoren jaiotza salbagarriaren berri  
artzainei aingeruen bidez eman zienak  
bete dezala bere pozez zuen bihotza  
eta egin zaitzatela bere Berri Onaren zabaltzaile. *℟̄*. Amen.

Bere Semearen gizon egiteaz  
zeru-lurrak bat egin dituenak,  
bete zaitzatela bere bakeaz eta gogo onez,  
eta eraman zeruko Elizarekin bat egitera. *℟̄*. Amen.

Bedeinka zaitzatela Jainko ahalguztidunak:  
Aitak, eta Semeak, ✠ eta Espiritu Santuak. *℟̄*. Amen.

Zoazte Jaunaren bakean. *℟̄*. Eskerrak Jainkoari.

Abenduaren 31n  
**FAMILIA SANTUA: JESUS, MARIA ETA JOSE**

### **Agurra**

Jainkoaren familia egin gaitu Jesusek.  
Haren grazia eta bakea zuekin!

### **Sarrerako Oharpena**

Eguberri zortziurrena edo oktaba ospatzen ari garela, Familia Santuaren jaia dugu gaur. Nazareteko familia ospatzeak Jesusen gizon egite apalera gerturatzen gaitu: Mesias giza-elkartera etorri da, giza-familiara. Mesias gu sakonetik berritzera etorri da, gutako bat eginez.

Ospa dezagun Igandeko familia-batzarra: Eukaristia. Bertan ematen zaigu ogi-ardotan geureganatzen den Hitza.

### **Damu-otoitza**

Salbamenaren misterioa ospatzera goaz. Zabal dezagun gure bihotza Jaunaren erruki mugagabera. Eska dezagun barkamena.

—Jesus Jauna, Maria Birjinagandik jaio eta gure **senide** egina: erruki, Jauna.

—Jesus Jauna, Jose eta Mariaren menpean **bizi** izan zinena: Kristo, erruki.

—Jesus Jauna, Jainkoaren seme eta alaba izatea **lortu** diguzuna: erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira. ✠. Amen.

## Otoitza

Oi Jainko,  
 egiazko bizi-eredua eman diguzu Familia Santuagan;  
 egizu, onbera, izan ditzagula geure familietan ere  
 haien harreman eta maitasun berberak,  
 betiereko zoriona izan dezagun zeruetako zure etxean.  
 Zure Seme Jesu Kristo gure Jaunaren bitartez,  
 Zurekin eta Espiritu Santuarekin batean  
 Jainko eta errege bizi baita, gizaldi eta gizaldietan. ℞. Amen.

## Hitzaren liturgiari oharpena

Familian denak izan behar du maitasun. Errukizko bihotzik eta gertutasunik gabe zaila da familiak sendo irautea. Odoleko familiaren harremanak kristau-familiara ere zabal daitezke. Bietan da ezinbestekoa ulermena, onarpena eta maitasuna. Nazaretoko Familia dugu honen guztiaren adibide eta eredu eder.

*Badira A-B-C urteetan egin daitezkeen irakurgaiak.  
 Guk, hemen, B urterako aukeran ematen direnak hautatu ditugu.*

## Lehenengo irakurgaia (Has 15, 1-6; 21, 1-3)

Hasiera liburutik

Egun haietan, Jauna ikuskari batean mintzatu zitzaion Abrami, eta esan zion: «Ez beldur izan, Abram! Ni nauzu zeure babeslea, eta handia izango da benetan zure saria».

Abramek, ordea, erantzun zion: «Ene Jainko Jauna, zer eman diezadakezu, baldin eta semerik gabe banoa, eta nire etxearen oinordeko Eliezer damaskoarra izango bada?» Eta esan zion gainera: «Hara, ez didazu ondorengorik eman, eta etxeko morroia izango dut oinordeko».

Baina Jaunak erantzun zion: «Ez horixe, morroia ez, baizik zure erraietatik sortuko dena izango duzu oinordeko».

Jaunak kanpora aterarazi zuen Abram eta esan zion: «Begira zerura eta konta itzazu izarrak, ahal baduzu». Eta, gainera, esan zion: «Horrenbeste izango dira zure ondorengoak». Abramek sinetsi egin zuen Jaunagan, eta Jaunak zuzentzat hartu zuen.

Agindu bezala, Jauna lagun etorri zitzaion Sarari eta hitzemana bete zion. Abraham zaharra izan arren, Sara haurdun gertatu zen, eta semea eman zion, Jainkoak iragarritako epean. Abrahamek, Isaak ezarri zion izena Sararengandik izandako semeari.

### Erantzun-salmoa (Sal 105 [104], 1-2. 3-4. 5-6. 8-9)

R/. Be - ra da Jau - na, gu - re Jain - ko - a, go - go - an  
du e - ten - ga - be be - re I - tu - na.

- ∇. Goretzazue Jauna, dei egin haren izenari,  
ezagutarazi herrien artean haren egintza bikainak.  
Kanta iezaiozue, jo soinua harentzat,  
kontatu haren mirri guztiak. ∇.
- ∇. Harro zaitetzue haren izen santuaz,  
poztu, bihotzez Jaunaren bila zabiltzatenok.  
Jo ezazue indartzen duen Jaunagana,  
bilatu etengabe haren aurpegia. ∇.



- ∇. Ekarri gogora hark egindako **mir**ariak,  
haren egintza harrigarriak eta agin**du** zuzenak,  
zuek, Jaunaren morroi Abrahamen ja**tor**rikook,  
Jakoben seme-alabok, haren au**ker**atuok. ∇.
- ∇. Gogoan du etengabe **ber**e ituna,  
mila gizalditarako **hit**zemana;  
Abrahamekin egin**iko** ituna,  
Isaaki egin**da**ko zina. ∇.

## Bigarren irakurgaia (Heb 11, 8. 11-12. 17-19)

Hebrearrei egindako gutunetik

Senideok: Sinesmenari esker, Abraham, Jainkoaren deiari erantzunez, ondareztat hartu behar zuen lurraldera abiatu zen, nora zihoan jakin gabe.

Sinesmenari esker hartu zuen ondorengoa ekartzeko indarra, bere emazte Sara agorra izan eta berak ere sasoia joana zuen arren, agintzaria egin ziona fidagarria zela sinetsi baitzuen. Horrela, gizon bakarragandik –eta berau horretarako hilik zegoela–, ondorengoak sortu ziren, zeruko izarrak bezain ugari eta itsasbazterreko hondarrak bezain kontaezin.

Sinesmenari esker opari eskaini zuen Abrahamek Isaak, Jainkoak probatu zuenean. Bera, agintzariak hartu zituen, prest zegoen bere seme bakarra eskaintzeko, nahiz eta seme horretaz esana zion Jainkoak: «Isaaken bidez izango dituzu ondorengoak». Uste bizia zuen Abrahamek Jainkoa gai dela hilak pizteko ere; horregatik, semea berreskuratzea Jainkoaren ahalmenaren ezaugarri gertatu zitzaion.

**Aleluia** (Ik. Eg 16, 14b)

∇. Ireki, Jauna, gure **bi**hotza,  
gogoz onar ditzagun zure Semearen **ren** hitzak. ✠.

**Ebanjelioa** (Lk 2, 22-40 edota laburrago: Lk 2, 22. 39-40)**Homiliarako argibideak**

*Maitasuna guztiaren gainerik*

Frantzisko Aita Santuak, *Amoris laetitia* edo *Maitasunaren alaitasuna* izeneko gutuna idatzi zuen duela urte batzuk. Gutun horretan, familia pastoraltzaren ibilbide-orri berria markatu zuen. Zalantzarik gabe, Kristau ezkontzan, bizitza osoan maitasunez bizitzeko konpromisoa hartzen da. Ezin diogu uko egin ideal horri. Baina, agertzen ari diren egoera berrien aurrean, Elizak haiengana hurbildu behar du, hartu, lagundu, bereizi, aholkatu eta laguntzeko. Eta dena errukiarekin. Zalantzarik gabe, familiaren funtsa baldintzarik gabeko maitasuna da.

Maitasun hori ez da kristauen monopolioa, pertsona guztiak daude amodioari irekita, eta familia mota bakoitza maitasun hori bizitzen saiatzen da egoerak eta baldintzek uzten dioten neurrian. Familiako pastoraltzaren erdian pertsona zehatzak daude, eta horiek

Jesusek familia batean jaio nahi izan zuen, neurri handi batean gizartearen oinarria zena eta izaten jarraitzen duena. Familian sentitu gara baldintzarik gabe, familiako kide izate hutsagatik: aita, ama,

semea, arreba, emaztea. Jainkoaren maitasun infinituak gaitasuna du pertsona mugatuen maitasunaren bidez adierazteko. Maitasun horri esker hazi gara, eta uste osoa eman digu biziak merezi duela.

Familia etxeko eliza da. Familia Santuarekin, Elizaren hasiera dugu, Maria eredutzat duena. Berak erantzun zuen bere federekin Jainkoaren Herriaren historiaren une erabakigarrian. Azken finean, familia guztiak dira fideltasuna eta elkarrekiko maitasuna hitz ematen duten bi pertsonen fede-egintza. Bakoitzak bestearengan sinesten du, bestea dela Jainkoarekin topo egitera iristeko bidea. Seme-alabengan, senar-emazteek Jainkoaren maitasun hori aurkitu dute. Familiari harrera egiteko eta bizitza sustatzeko ardura eman zaio. Jainkoak senar-emazteak beren ekintza sortzailearekin lotu nahi izan ditu. Jaiotza bakoitza Gabonetako misterioaren luzapena da. Bata bestearekin eta biak Jainkoarekin fidatu diren bi pertsonen maitasunaren emaitza da. Jainkoa da bere leialtasunaren eta maitasunaren betikotasuna berma dezakeen bakarra.

Maria eta Josek, Jesus tenpluan aurkeztuta, onartu dute Jainkoaren dohaina dela, eta bere zaintzapean utzi dutela. Simeon eta Anak adi-adi entzuten dituzte haur horren bizitzaren norabidea argitzen duten profeziak (*Lk 2, 22-40*). Gabonetako poztasunaren erdian lehen itzalak agertzen dira. Haur hori bandera eztabaidatua izango da, eta haiak ezin izango dute ezer egin amaiera tragikoa saihesteko. Eukaristiaren ospakizunak maitasuna sendotu dezala gure familien barruan, eta gizateria guztiak Jainkoaren seme-alaben familia osatzen duela jakitera eraman gaitzala.

## **Jainkoaren herriaren otoitza**

Senideok: egin diezaiogun otoitz Jesu Kristo Jaunari, familia santutzeko giza familia batean bizi nahi izan zuenari:

*Erantzuna:* ✠. **Erakuts guri, Jauna, zure bihotza ona.**





- Maria eta Joseren etxean familia-bizitza elkarbanatu zuen Jaunak, zaindu dezala bakean kristau-familia guztien elkarbizitza. Egigun otoitz.  $\text{R}^{\text{z}}$ .
- Senargai eta emaztegai guztiak, Jainkoaren presentzia sumatuz eta elkarren maitasuna biziz, egoki presta daitezen Ezkontzako Sakramenturako. Egigun otoitz.  $\text{R}^{\text{z}}$ .
- Jainkoak familia zatituak argitu eta gogoberotu ditzan. Lana dela eta bereiztuta bizi behar duten senar-emazteak, familia zatituetako kideak, haurrik ez dutelako sufritzen dutenak eta senideren baten heriotza dela eta negarrez daudenak, indartuak gerta daitezen. Egigun otoitz.  $\text{R}^{\text{z}}$ .
- Gure familian eta kristau elkartean bakean bizitzen saiatzen garenon alde: gaindi ditzagula ontasunez, ulermenez eta maitasunez izan ditzakegun zailtasun eta konponezinak. Egigun otoitz.  $\text{R}^{\text{z}}$ .

Jainko Jauna, gizaldi guztiak baino lehen sortutako zure Semea giza familia baten kide egin zenuen; entzun gure otoitzak eta egizu gurasoek parte izan dezatela zure maitasun ugarian, eta seme-alabak hazi daitezela jakindurian, ulermenean eta grazian zure aurrean eta gizaki guztien aurrean. Jesu Kristo gure Jaunaren bitartez.  $\text{R}^{\text{z}}$ . Amen.

**Oparigaien gaineko otoitza**

Bakezko opari hau Zuri eskaintzean, Jauna,  
apal-apal eskatzen dizugu:  
Jainkoaren Ama Birjinaren eta Jose santuaren otoitzari esker,  
gure familiak bizi daitezela sendo  
zure adiskidetasunean eta bakean.  
Jesu Kristo gure Jaunaren bitartez. *℟̄.* Amen.

**Prefazioa: Eguberritako II. Prefazioa.** (*Meza-liburua: 474. or.*)

**Jaunartze ondorengo otoitza**

Aita guztiz onbera,  
sakramentu honen bidez indarberritu gaituzunok  
bizi gaitzela Familia Santuaren antzera,  
lur honetako nekeen ondoren berarekin batean  
betiko zoriona irits dezagun.  
Jesu Kristo gure Jaunaren bitartez. *℟̄.* Amen.

**Bedeinkapen Nagusia** (*Liburuxka honetan: 20. or.*)

Urtarrilaren 1ean  
**JAINKOAREN AMA MARIA SANTUAREN FESTABURUA**

**Agurra**

Errukiaren eta bakearen Jainkoa izan bedi zuekin.

**Sarrerako Oharpena**

Jainkoaren Ama Maria Santuaren festaburua dugu gaur, Eguberri-zortzigarren honetan. "Jainkoaren Ama" aitortzen dugu Maria, berarengan gizon egin baitzen Jainkoaren Hitza.

Urteko lehen egun honetan Mariaren Seme Jesusi, Bakearen Erregeari, eska diezaiogun iritsi dadila lurreko bazter guztietara bere jaiotzaz munduari ekarri dion egiazko bakea.

**Damu-otoitza**

*Urte berri egunez iturrira joan eta ur berria hartzea ohitura zaharra zen gure herrietan. Has daiteke gaurko meza (damu-otoitza utzita) ura bedeinkatuz eta herria urez zirtatuz. (Ikus bedeinkapen otoitza liburuxka honetan 102. orrialdean).*

Ospakizunaren hasieran eska dezagun bekatuen barkamena, misterio santuak ospatzeko gai izan gaitzen.

✠. Erruki, Jauna. ✠. Bekatu egin dugu-ta.

✠. Agertu guri, Jauna, zeure bihotz ona. ✠. Eta salba gaitzazu.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

✠. Erruki, Jauna. ✠. Erruki, Jauna.

✠. Kristo, erruki. ✠. Kristo, erruki.

✠. Erruki, Jauna. ✠. Erruki, Jauna.

**Aintza**

Bat egin dezagun zeruko nahiz lurreko senide guztiekin, Jainkoa bihotz-bihotzez goratzeko.

**Otoitza**

Maria dohatsua birjina izanik ama eginez,  
gizadiari salbamera eman diozun Jainkoa,  
egizu, laguntzaile ere izan dezagula zure aurrean  
beraren bidez lortu baikenuen biziaren sortzailea,  
zure Seme Jesu Kristo gure Jauna.

Zurekin eta Espiritu Santurekin batean

Jainko eta errege bizi baita gizaldi eta gizaldietan. ℟. Amen.

**Hitzaren liturgiari oharpena**

Biblia, bere osotasunean harturik, Jainkoak bere herriarekin izan duen historia da: maitasun historia, bedeinkapen eta salbamen historia. Horixe entzungo dugu gaur ere: Jaunak gure alde ari da, Jauna gurekin da beti gu salbatzen eta gu bedeinkatzen.

**Lehenengo irakurgaia** (*Zen 6, 22-27*)

Zenbakiak liburutik

Honela mintzatu zitzaion Jauna Moisesi: «Esaiezu Aaroni eta haren semei: Honela bedeinkatuko dituzue israeldarrak: "Bedeinka zaitzala Jaunak eta zaindu. Ager diezazula Jaunak aurpegi argia, eta erruki dadila zutaz. Erakuts diezazula Jaunak aurpegi gozoa, eta eman bakea".

Honela dei egingo diote nire izenari israeldarren alde, eta Nik bedeinkatu egingo ditut».

**Erantzun-salmoa** (*Sal* 67 [66]. 2-3. 5. 6 eta 8)

A-ger - tu zu - re bi- hotz o - na. E-man, Zuk, Jau -  
na, o - sa - su - na.

- ∞. Erruki bekigu Jainkoa eta bedeinka **gaitz**ala,  
ager diezagula aurpe**gi** argia,  
ezagut dezaten munduan zure **bide**a,  
nazio guztietan Zugandiko sal**ba**mena. ∞.
- ∞. Poztu bitez kantari na**zi**oak,  
zuzentasunez baitituzu gobern**atzen** herriak  
eta gidatzen munduan na**zi**oak. ∞.
- ∞. Ene Jainko, aipa zaitzatela **herri**ek,  
aipa zaitzatela **herri** guztiek.  
Bedeinka gaitzala **Jain**koak,  
izan diezaiola begirune mundu **o**soak. ∞.

**Bigarren irakurgaia** (*Ga* 4, 4-7)

San Paulo Apostoluak Galaziarrei egindako gutunetik

Senideok: Garaia bete zenean, bere Semea bidali zuen Jainkoak, emakumeagandik jaioa, legepeko egina, legepean zirenak askatzera, guk seme-alabatzakoa har genezan. Eta seme-alaba zareten seinaleztat bere Semearen Espiritua bidali du Jainkoak gure bihotzera, «Abba! Aita!» deika ari dena. Beraz, aurrerantzean ez zara esklabo, seme edo alaba baizik, eta seme edo alaba bazara, baita oinordeko ere, Jainkoari esker.

**Aleluia** (*Heb 1, 1-2*)

A - le-lu - ia, a - le-lu - ia, a - le-lu - ia, a - le-lu - ia.

- ∇. Askotan eta era askotara,  
hitz egin zien antzina Jainkoak profeten bidez gure ar**bas**oei;  
azkenak diren egun **hau**etan, berriz,  
bere Semearen bidez hitz **egin** digu. ∇.

**Ebanjelioa** (*Lk 2, 16-21*)**Homiliarako argibideak**

1. Urte baten amaierak eta beste baten hasierak denboran zehar iragaten den bizitzaren iheskortasunaren zentzua biziartzen dio gizakiari. Orduan agertzen da esplikatzeko eta definitzeko zaila den misterio bat bezala. Denaren esperientzia daukagu eta, aldi berean, ez dakigu nola azaldu. San Agustinek denborari buruzko galderari erantzuten dio: «Inork galdetzen ez badit, badakit. Baina galdetzen didanari azaldu behar badiot, orduan ez dakit. Zalantzarik gabe esaten dudana da badakidala ezer gertatuko ez balitz ez legokeela iraganik; ezer jazoko ez balitz, ez legokeela etorkizunik, eta ezer existituko ez balitz, ez legokeela orainik». Elizak urtarrilaren lehena ezarri du Maria, Jainkoaren Ama, ospatzeko eta Jainkoaren Hitza denboran haren bidez sartu zela azpimarratzeko egun.

2. San Paulok bigarren irakurragian gogorarazi digunez, denboraren osotasuna iristean, bere Semea bidali zuen Jainkoak, emakume batengandik jaiotakoa, legearen pean geundenak askatzeko, denboran bizi diren eta eginkizun bat betetzen duten seme-alaba

bihurtzeko. Denborari zentzua ematera dator Kristo, eta betierekotasuneranzko proiektzioa erakusten digu. Kristauontzat, prestaketa-denboren helburua iritsi den Jesusekin. Giza hazkuntza prozesu osoa onartu zuen Jesusek denboran zehar eta horren esperientzia bizi izan zuen. Bere predikuan, Jainkoak historian zehar denboran zehar gertatzen diren gertakarien bidez adierazten duena ulertzeko gonbita egin zuen. Denboraren amaieraz ere hitz egin zuen Kristok, baina ez zuen jakitera eman mendeen burutzea noiz egiaztatu behar den.

3. Gizaki garen aldetik, denboran aurrera goaz. Pozak eta atsekabeak, itxaropenak eta errealizazioak, bilaketak eta topaketak gertatzen dira bertan. Kristauak badaki oraingo neke-lanak ezer gutxi direla gero guregan azalduko den aintzaren aldean (Erm 8,18) eta, horregatik, mundu justuago eta gizatiarrago baten aldeko lanean konprometitzen duen itxaropen aktibo batekin bizi du bere eguneroko bizitza. Iragandako urteak gogoratzean, behin betikora begiratzeraz gonbidatzen gaitu Bibliak, Jainkoak, Kristoren bidez, egoitza eta lurralde berri bat prest dugula erakutsi baitigu, justiziazkoa, eta bertan zoriona gai dela giza bihotzean sortzen diren bake-irrika guztiak asetzeko eta gaingintzeko. Bide horretan, Mariak, Jainkoaren Amak, fedearen eta itxaropenaren erromes gisa laguntzen gaitu.

### Jainkoaren herriaren otoitza

Senideok: zuzen diezaiozun gure otoitza Jaunari, eta Bere Semearen Ama bitarteko dugula eska dezagun bere errukia gizaki guztientzat:

*Erantzuna:* ☩. **Erakuts guri, Jauna, zure bihotza ona.**



E-ra kuts gu ri, Jau- na, — zu - re bi-hotz o - na.

- Fededun guztiek, Mariaren antzera bihotzean gorde eta hausnar dezaten Jainkoaren Semeaz entzuna, gero gartsu hots egiteko. *℟*.
- Herrialde eta arraza guztietako gizon eta emakumeak, guztion Aita den Jainko bakarra aitortuz elkarren senide bezala bizi daitezen. *℟*.
- Gerra eta injustizia, zapalketa eta gosea nozitzen duten herrian deia Jaunarengana iritsirik ahal bezain laster egiazko bakera eta elkarbizitzara iritsi daitezen. *℟*.
- Urte berriaren hasiera Jainkoari eskaintzera hemen bildu garenok, bizi ditzagula bakez urte honen egun guztiak eta osasun eta alaitasunez bukaerara hel gaitezen. *℟*.

Betiereko Jainko Jauna entzun gure otoitzak eta bedeinka ezazu hastera goazen urte berri hau: gure eguneroko lanak eman diezagula eguneroko ogia eta gure bihotzek aurki dezatela zure Hitzarengan asebeteko dituen eta ongiaren bidetik eramango dituen egiazko janaria. Jesu Kristo gure Jaunaren bitartez. *℟*. Amen.

### **Oparigaien gaineko otoitza**

Oi Jainko, Zuk ematen diezu hasiera asmo on guztiei eta Zuk dituzu burutzen;  
 Jainkoaren Ama santuaren festaburu honetan eskatzen dizugu, salbamenaren hasiera pozik ospatzen dugunok irits dezagula egun batean salbamen horren betea.  
 Jesu Kristo gure Jaunaren bitartez. *℟*. Amen.

**Prefazioa: Mariaren Birjinaren I. Prefazioa.** (*Meza-liburua: 520. or.*)



### Jaunartze-ondorengo otoitza

Jauna, pozik hartu ditugu sakramentu zerutarrak;  
egizu, Maria beti Birjina dohatsua  
zure Semearen sortzaile eta Elizaren amatzat  
aitortzen eta goosten dugunok  
laguntza izan ditzagula betiko bizia lortzeko.  
Jesu Kristo gure Jaunaren bitartez. *R̄.* Amen.

### Bedeinkapen Nagusia

Jauna zuekin. *R̄.* Eta zure espirituarekin.

Makurtu burua Jaunaren bedeinkapena hartzeko.

*(Eskuak herriaren gain zabalik bedeinkapena esango du:)*

Bedeinkapen guztien iturri den Jainkoak  
eman diezazu bere grazia,  
isur dezala zuen gainera bere bedeinkapen ugaria  
eta gorde zaitzatela urte guztian bizirik osasuntsu. *R̄.* Amen.

Egin zaitzatela berak egin zaitzatela sinesmenean sendo,  
itxaropenean zintzo  
eta bizitzako gorabeheretan  
maitasunean iraunkor azkeneraino. *R̄.* Amen.

Urte berri honetan  
era ditzala zuen egunak eta lanak bere bakean,  
entzun ditzala zuen eskariak nonahi eta beti  
eta eraman zaitzatela betiko bizira. *R̄.* Amen.

Bedeinka zaitzatela Jainko ahalguztidunak:  
Aitak, eta Semeak, ✠ eta Espiritu Santuak. *R̄.* Amen.

Zoazte Jaunaren bakean. *R̄.* Eskerrak Jainkoari.

## Urtarrilaren 6an

# JAUNAREN AGERKUNDEA

### Agurra

Herri guztien argia, edertasuna eta salbamena den Jesus Jaunaren bakea izan bedi zuekin.

### Sarrerako Oharpena

Agerkunde egun honetan, ikusten dugu, Mesiasen salbamena Israel herria gainditu eta mundu osora heltzen dela, denentzat argi izateko. Argi horren arabera bizi nahi dugu senidearen bidera ateraz. Horixe izan daiteke geu ere Jesusentzat dohain preziatu, ukendu gozo eta usain atsegin izateko era bikaina.

### Damu-otoitza

Senideok: Bihotz garbi eta apalekoek bakarrik jaso dezakete Eguberritan ospatzen dugun Jainko gizon eginaren misterioa eta berri ona. Aitor ditzagun, bada, apaltasunez ,geure bekatuak.

—Jesus Jauna, diren guztiei izatea eman diezun Aitaren **beti**ereko Hitza : erruki, Jauna.

—Jesus Jauna, mundu honetara etorri eta mundu honek onartu ez zaituen **egi**azko Argia: Kristo, erruki.

—Jesus Jauna, gizon eginik gure artean bizilekua jarri duzun Jain**ko**aren Semea: erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

### Aintza

Betleemgo herrian hasitako poza mundu osoari agertzen zaio gaur. Jaunaren Agerkundera ospatzean kanta dezagun Aintza Zeruetan.

**Otoitza***(Bezpera-arratsaldeko Meza)*

Argitu, Jauna, gure bihotza  
 zeure handitasunaren argi distiratsuaz,  
 mundu honetako ilunpetan zehar onik igarotzeko  
 eta betiko argiaren erreinura iristeko gai izan gaitezen.  
 Zure Seme Jesu Kristo gure Jaunaren bitartez,  
 Zurekin eta Espiritu Santurekin batean  
 Jainko eta errege bizi baita gizaldi eta gizaldietan. ✠. Amen.

*(Eguneko Meza)*

Oi Jainko, egun honetan agertu zenien, izarra gidari zela,  
 zeure Seme bakarra jentil-herriei;  
 izan zaitetz gurekin onbera  
 eta eraman gaitzazu sinesmenez ezagutzen zaitugunok  
 zeure aintzaren ederra bete-betea gozatzera.  
 Zure Seme Jesu kristo gure Jaunaren bitartez,  
 Zurekin eta Espiritu Santurekin batean  
 Jainko eta errege bizi baita gizaldi eta gizaldietan. ✠. Amen.

**Hitzaren liturgiari oharpena**

Poesiaz eta hitz ederrez, Jerusalem berria nolakoa izango den agertzen digu Isaiasen irakurgaiak. Jerusalem berri hori gizadi osora zabaltzen da: Jaunaren argitan iluntasunaren kateak hautsirik berritua izango baita dena eta askatasunez beteak gizon-emakume guztiak.

**Lehenengo irakurgaia** (*Is 60, 1-6*)

Isaias Profetaren liburutik

Jaiki zaitetz, Jerusalem, argitu, badator-eta zure argia; zure gainean ageri da Jaunaren aintza. Begira, ilunpeak estalia du lurra, gau beltzak herriak; zure gainean, ordea, Jauna agertuko da, haren aintza zure gainean azalduko.

Zure argira etorriko dira herriak, zure egunsenti-distirara erregeak. Jaso itzazu begiak zeure ingurura eta ikusi: guztiak elkartu eta zugana datoz, urrutitik datoz zure semeak, besoetan dakartzate zure alabak.

Hori ikustean, distiratsu jarriko zara, bihotza zirrarez eta zabaldurik duzula, itsasoko aberastasunak zugana etorriko baitira eta nazioen ondasunak zuri ekarriko dizkizute. Gamelu-taldeen estaliko zaituzte, Madiango eta Efako dromedarioek. Sabatik datoz guztiak, urrea eta intsentsua dakartzatela, eta Jaunari gora eta gora diotsotela.

### Erantzun-salmoa (Sal 72 [71], 1-2. 7-8. 10-11. 12-13)

I - ku - si du - te lur mu - ga de - nek gu - re Jain - ko -  
 a - gan - di - ko ga - rai - pe - na.

- ∇. Ene Jainko, emaiozu zeure zuzentasuna erregeari,  
 zeure justizia erregearen semeari.  
 Goberna beza zure herria justiziaz,  
 zure dohakabeak zuzenbidez. ∇.
- ∇. Haren egunetan, lora bedi justizia,  
 ugaldu bakea, ilargia itzali arte.  
 Izan bedi nagusi itsasotik itsasoraino,  
 lurraren bazter batetik besteraino. ∇.
- ∇. Ekar biezazkiote opariak 'Tarsisko eta uharteetako erregeek,  
 ordaindu zergak Sabako eta Sebako erregeek.  
 Agurtu bezate ahuspezturik errege guztiek,  
 izan bitza menpeko nazio guztiak. ∇.

- ℣. Berak libratuko du oihuka ari den behartsua,  
nork lagundurik ez duen dohakabea.  
Cupida izango die gizagaixo eta behartsuei,  
bizia salbatuko pobreei. ℞.

### Bigarren irakurgaia (Ef 3, 2-3a. 5-6)

San Paulo Apostoluak Efesoarrei egindako gutunetik

Senideok: Jakingo duzue, noski, Jainkoak bere onginahian zuen onerako eman didan eginkizuna, goi-agerpenez jakinarazi baitit bere asmo ezkutua; salbamen-asmo hau ez zitzaien iraganeko gizaldiei jakinarazi; orain, ordea, Espirituaren bidez bere apostolu santuei eta profetei agertu die Jainkoak. Eta hauxe da Jainkoaren asmo ezkutua: Berri Onari esker, jentilak Kristo Jesusekin oinordekide direla, harekin gorputz bat bera osatzen dutela eta agintzari beraren partaide direla.

### Aleluia (Mt 2, 2)



- ℣. Haren izarra ikusi dugu sortaldean  
eta hura gurtzera gatoz. ℞.

### Ebanjelioa (Mt 2, 1-12)

#### Ebanjelio ondoren: 2024. urteko ospakizunen berri ematea

*Ebanjelioaren ondoren, eman daiteke 2024. urtean zehar izango diren liturgi-ospakizunen berri, Meza-liburuaren 1304. orrialdean agertzen den moduan.*

## Homiliarako argibideak

1. Gure munduaren ezaugarria informazio azkarra eta berehalakoa da. Orain, denbora errealean dakigu zer gertatzen den munduan. Mundu globalizatu batean, informazioa menderatzen duenak dena menperatzen du. Informazioaren bidez, errealitatea ezagutzeaz gain, geure burua ezagutzera ematen dugu. Propaganda beharrezkoa da saldu nahi dituzun produktuak edo zerbitzuak ezagutarazteko. Publizitatean inbertitzen ez duenak pertsona, fabrika edo erakunde gisa ikusezina izateko arriskua du. Milaka milioi euro inbertitzen dira iragarkietan, ezagutzera emateko, harremanak ezartzeko. Informazioaren kultura honetan, errazago ulertzen dugu Errege Egunaren jaiaren esanahia: herri guztiei Jainkoaren Semearen haragitzea eta hark ekarritako berri ona aldarrikatzeko jaia da. Kristo agertu ez balitz, ez genukeen ez bera, ez bere mezua ezagutuko.

2. Gaurko irakurgetan Kristoren jaiotzaren aldarrikapenaren unibertsaltasunaz hitz egiten digute. Aldi berean, berri onaren informazioa lortzeak eskatzen duena aurkezten digu ebanjelioak. Magoek bilatu, galdetu eta pertseberatu egiten dute, Kristok bere ama Mariarekin aurkitu arte. Gainera, gizadi osoa ordezkatzeko dute, Berreroslearen jaiotzaren berri handi hori helarazten zaien herri guztiak. Haien arduratuko dira, aurrerago, Jainkoak arraza, hizkuntza eta nazioa zatiketa guztiak gainditzera, eta giza familia handiaren elkartasuna guztion Jainkoaren eta Aitaren maitasunarekin bat eginda bizitzera egindako gonbita transmititzeaz.

3. Guk ezagutu dugu berri ona. Badakigu zer esan nahi duen gure bizitzarako. Kristok (berri ona) aldarrikatzera bidaltzen gaitu, ez milioi asko kostatzen den propaganda baten logikarekin, baizik eta ebanjelioaren logikarekin, hau da, esperientzia pertsonal bat transmititzeko; esperientzia hori ez da dirua kostatzen, eta ez du ez diruren, ez eta etengabeko publizitate-bonbardaketa baten giza egituren laguntza ere, sekta askok gau eta egun egiten duten bezala.



—Kristoren benetako argia ezagutu dugunok, egiazko fedean sendoturik gero eta leialago bizi gaitezen Ebanjelioko irakaspenetan. ✠.

Entzun gure otoitzak, Jainko ahalguztidun eta betierekoa, eta egizu zure Semea ezagutu eta Herri guztien Errege eta Jaun gurtu dugunok, argiaren seme-alaba bezala bizirik Kristoren distira helaraz dezagula gizarteko eta munduko bazter guztietara. Errege bizi baita gizaldi eta gizaldietan. ✠. Amen.

### **Oparigaien gaineko otoitza**

*(Bezpera-arratsaldeko Meza)*

Onartu, Jauna, zure Seme bakarraren Agerkundera eta lehenengo jentilak erakarri izana ospatzeko eskaintzen dizkizugun oparigaiak; egizu, izan daitezela zure gorespenerako eta betiko gure salbamenerako. Jesu Kristo gure Jaunaren bitartez. ✠. Amen.

*(Eguneko Meza)*

Begira, Jauna, begi onez zeure Elizaren dohain hauei; ez dizugu horietan urre, intsentsu eta mirrarik eskaintzen, baizik horiek adierazten duten Jesu Kristo gure Jauna, opari egingo dena eta janari emango zaiguna. Errege bizi baita gizaldi eta gizaldietan. ✠. Amen.

### **Eukaristiaren liturgiari oharpena**

Magoen egun honetan, katekista guztien eguna ere bada. Gure parrokitan beraiek dira Kristo “agertzen” dutenak, ematen duten heziketaren eta testigantzaaren bidez. Une honetan, eman diezazkiogun eskerrak Jainkoari katekista guztiengatik.

**Prefazioa: Jaunaren Agerkundeko Prefazioa.** *(Meza-liburua: 476. or.)*



**Jaunartze-ondorengo otoitza***(Bezpera-arratsaldeko Meza)*

Janari santu honekin biziberriturik,  
otoitz egiten dizugu, Jaun errukitsua,  
zure zuzentasun-izarrak argitu ditzala beti gure gogo-bihotzak  
eta Zu aitortzea izan dadila gure oparia.  
Jesu Kristo gure Jaunaren bitartez. *℟*. Amen.

*(Eguneko Meza)*

Jauna, izan dezagula lagun zure argia nonahi eta beti,  
ospatu dugun misterio hau fede garbiz sakon dezagun  
eta maitasun gartsuz onartu.  
Jesu Kristo gure Jaunaren bitartez. *℟*. Amen.

**Bedeinkapen Nagusia**

Jauna zuekin. *℟*. Eta zure espirituarekin.

Makurtu burua Jaunaren bedeinkapena hartzeko.

*(Eskuak herriaren gain zabalik bedeinkapena esango du:)*

Ilunpetatik bere argi miragarrira deitu zaituzten Jainkoak  
isur dezala zuen gainera bere bedeinkapena  
eta sendo zaitzatela sinesmenean,  
itxaropenean eta goi-maitasunean. *℟*. Amen.

Gaurko egunez munduari  
ilunpeetan argi distiratsu agertu zitzaion Kristok  
egin zaitzatela bere jarraitzaile  
eta zuen anai-arrebentzat argi. *℟*. Amen.

Magoek, izarra gidari, Kristoren bila ibili ondoren,  
poz handiz aurkitu zuten bezala,  
eman diezazuela zuei ere Jainkoak,  
mundu honetako ibilaldiaren ondoren,  
argitik argi den Kristogana iristea.  $\text{R}^{\text{z}}$ . Amen.

Bedeinka zaitzate Jainko ahalguztidunak:  
Aitak, eta Semeak,  $\text{X}$  eta Espiritu Santuak.  $\text{R}^{\text{z}}$ . Amen.

Zoazte Jaunaren bakean.  $\text{R}^{\text{z}}$ . Eskerrak Jainkoari.

## Urtarrilaren 8an **JAUNAREN BATAIOA**

### **Agurra**

Aitaren Seme maitea den Jesus Jaunaren grazia eta bakea zuekin.

### **Sarrerako Oharpena**

Jaunaren Bataioaren jaia ospatzen dugu gaur. Jesus da Jainkoaren Zerbitzaria, Espirituak Gantzututako Mesias, Aitak Semetzat aitortu zuena, herri guztien salbamenaren Berri Ona iragartzera bidalia.

### **Ura bedeinkatzeko eta ur bedeinkatuz zirtatzeko ohikunea**

Senide maiteok: egin diezaiogun otoitz Jainko gure Jaunari, geure Bataioaren oroipenez geure burua zirtatzeko erabiliko dugun ur hau bedeinka dezan. Ur honek berrizta gaitzala, hartu dugun Espirituari beti leial izan gakizkion.

*Isilune labur baten ondoren, eskuak bildurik jarraituko du:*

Jainko ahalguztidun betierekoa, ura biziaren iturri eta sorburu eginik, gizon-emakumeen arima garbitzeko indarra ere eman diozu, guk ur honetan betiko biziaren dohaina har dezagun; bedeinka + ezazu ur hau, Jauna, zurea den egun honetan indar gaitzan.

Ur honen bidez berri ezazu gudan zeure graziaren iturri bizia, zaindu gaitzazu gorputz-arimetako gaitz guztietatik, Zugana bihotz garbiz hurbil gaitezen, eta zure salbamina irits dezagun. Jesu Kristo gure Jaunaren bitartez. **℟̣. Amen.**

*(Herria zirtatzen du, Bataio-kantu egoki bat kantatzen den bitartean)*

Jainko ahalguztidunak garbi gaitzala bekatutik eta, Eukaristia honen bidez, bere erreinuko mahaian jartzeko gai egin gaitzala. **℟̣. Amen.**

℣. Erruki, Jauna. ℞. Erruki, Jauna.

℣. Kristo, erruki. ℞. Kristo, erruki.

℣. Erruki, Jauna. ℞. Erruki, Jauna.

## Aintza

Gora dezagun Jainkoa bihotzez, Aintza kantatuz.

## Otoitza

Jainko ahalguztidun betierekoa,  
 Kristo Jordan ibaiko uretan bataiatua izan zenean  
 goraki aitortu zenuen, Espiritu Santua haren gainera bidaliz,  
 hura zela zure Seme maitea:  
 emaiezu, uretik eta Espiritu Santuagandik jaio diren  
 zure seme-alabatzakoei, zure maitasunean irautea beti.  
 Zure Seme Jesu Kristo gure Jaunaren bitartez,  
 Zurekin eta Espiritu Santurekin batean  
 Jainko eta errege bizi baita gizaldi eta gizaldietan. ℞. Amen.

*Edota:*

Oi Jainko, zure Semea haragizko gure izaeran agertu da;  
 egizu, kanpotik gure antzeko aitortzen dugun hark  
 eraberri gaitzala barnetik bere antzeko eginez.  
 Zurekin eta Espiritu Santuarekin batean  
 Jainko eta errege bizi baita, gizaldi eta gizaldietan. ℞. Amen.

## Hitzaren liturgiari oharpena

Jaunaren promesak betetzen ari dira: Jaunaren Bidaliak bere  
 bataiokoan hasten duen misioaren hasieran agertuko zaigu gaur hori.  
 Kristo da aukeratua, Kristo zerbitzari apala, gizon-emakume guztiei  
 Jainkoaren seme-alabatza eta askatasuna ematen dizkiguna.

*Badira A-B-C urteetan egin daitezkeen irakurgaiak.  
Guk, hemen, B urterako aukeran ematen direnak hautatu ditugu.*

## **Lehenengo irakurgaia** (Is 55, 1-11)

Isaias Profetaren liburutik

Honela mintzo da Jauna:

«Egarri zareten guztiok, zatozte ur bila,  
etorri, dirurik ez duzuenok ere;  
erosi garia eta jan ordaindu gabe, erosi ardoa eta esnea hutsean.  
Zergatik gastatu dirua, goserik utziko zaituzten janaritan,  
eta lansaria, aseko ez zaituzten gauzatan?  
Entzun Niri arretaz, eta ondo jango duzue,  
janari gozo mamitsuz elikatuko zarete.

Etorri Nigana eta egon adi,  
entzudazue eta biziko zarete.  
Betiko ituna egingo dut zuekin,  
Davidi eginiko maitasunezko agintzariari leial eutsiz.  
Herrientzako testigu jarri nuen David,  
nazioen buruzagi eta agintari.  
Ezagutzen ez zenuen herriari egingo diozu dei,  
eta ezagutzen ez zintuen herria lasterka etorriko da zugana,  
Jaunagatik, zure Jainkoagatik,  
ospez jantzi zaituen Israelgo Santuagatik.

Bila ezazue Jauna, aurki daitekeen bitartean;  
hots egiozue, hurbil dagoen bitartean.  
Utz beza gaiztoak bere bidea,  
gaizkileak bere asmo txarrak;  
itzul bedi Jaunagana, errukiz hartuko baitu,  
gure Jainkoagana, guztiz barkabera baita.  
Nire asmoak ez dira zuenak bezalakoak,  
ezta zuen jokabidea ere nirea bezalakoa, dio Jaunak.

Nola zerua lurraren gainetik garai,  
hala nire jokabidea zuen jokabidearen gainetik,  
nire asmoak zuen asmoen gainetik.

Euria eta elurra zerutik jaisten dira  
eta ez dira berriro hara itzultzen,  
lurra ase, ernaldu eta ernamuindu gabe,  
ereiteko hazia eta jateko ogia eman ditzan;  
hala egingo du nire ahotik ateratako hitzak ere:  
ez da Nigana hutsik itzuliko,  
baizik eta egingo du Nik nahi dudana  
eta beteko Nik ezarritako helburua».

**Erantzun-salmoa** (Is 12, 2. 3 eta 4bcd. 5-6)



R/. A - te - ra - ko du - zu - e u - ra po - ze - tan



sal - ba - me - na - ren i - tu - rri - e - ta - tik.



- ∇. Jainkoa dut sal**bat**zaile!  
Badut uste on eta ez naiz **beld**ur,  
Jauna baitut indar eta **kem**en,  
hura neure **sal**bamen. R̄.
- ∇. Aterako duzue ura pozik '  
salbamenaren iturri**et**atik.  
«Eskerrak Jaunari, dei egin haren izen**ari**,  
iragarri haren egintzak her**rie**i,  
aldarrikatu zein bikaina den haren**en** izena. R̄.

℣. Kanta Jaunari, bikain jokatu baitu,  
 jakin bezate honen berri mundu osoan.  
 Egin poz-irrintzi eta oihu, Siongo bizilagunok,  
 handikiro ari baita zuen alde Israelgo **Santua**». ℟.

### **Bigarren irakurgaia** (1 Jn 5, 1-9)

San Joan Apostoluaren lehenengo gutunetik

Senide maiteok: Jesus Mesias dela sinesten duen oro Jainkoagandik jaio da, eta bizia ematen duen Jainkoa maite duenak harengandik jaioa ere maite du. Beraz, Jainkoa maite badugu eta haren aginduak betetzen baditugu, badakigu Jainkoaren seme-alabak maite ditugula. Izan ere, Jainkoa maitatzea haren aginduak betetzea da. Eta haren aginduak ez dira astunak, Jainkoagandik jaio den orok garaitu egiten baitu mundua. Eta hau da munduaren gain garaipena ematen diguna: gure sinesmena.

Zein da mundua garaitzen duena, Jesus Jainkoaren Semea dela sinesten duena baizik? Hau da bataioko uraz eta heriotzako odolaz etorri zena, Jesu Kristo; ez uraz bakarrik, uraz eta odolaz baizik. Eta Espiritua da honetaz aitormen egiten duena, Espiritua egia baita. Honela, bada, hiru dira aitormen egiten dutenak: Espiritua, ura eta odola, eta hirurak bat datoz.

Gizakien aitormena ontzat ematen baldin badugu, balio handiagokoa da Jainkoaren aitormena, eta Jainkoak bere Semeaz egiten du aitormen.

**Aleluia** (Ik. Jn 1, 29)

A - le-lu - ia, a - le-lu - ia, a - le-lu - ia, a - le-lu - ia.

- ∇. Ikusi zuen Joan Bataiatzaileak  
 Jesus beregana etortzen eta esan zuen:  
 «Hona hemen Jainkoaren **Bil**dotsa,  
 hona munduko bekatua kentzen duena». ∇.

**Ebanjelioa** (Mk 1, 7-11)**Homiliarako argibideak**

1. Antzinatik, Epifania, hau da, magoei agertzea, Jesusen bataioko Aitaren ahotsa, atsegin ematen dion Seme maitea aldarrikatzen duena, eta, azkenik, Galileako Kanako ura ardo bihurtzea batu ditu Elizak Jaunaren adierazpen gisa, Jesusek bere aintza adierazi eta bere jarraitzailek Harengan sinetsi zutenekoa. Gaur egun, hiru gertaera horien oroitzapenak ezer gutxi esaten die kristauei, ezer ez, akaso. Jaunaren beste adierazpen batzuk aurkitzen jakin behar da, gaurko bizitzarekin lotuagoak daudenak, eta hori lortzeko bidea jakin behar da.

2. Jesusen bataioren jaiak Jesusen presentzia eta ekintza ezagutzeko eta besteei jakinarazi ahal izateko bidea erakusten digu. Lehenik eta behin, entzun egin behar da eta, aldi berean, gure bataiaren egunean jaso genuen eta gure artean Jainkoaren seme-alaba eta anai-arreba bihurtu gintuen Espirituaz jabetu behar da. Kristori entzuteak bere irakaspenetan, bere jokaeran, guran duen presentzian sartzea esan nahi du. Berak lagunduko digu besteetan aurkitzen, baita



ezagutzen ez dutenetan ere. Fedean hazten lagunduko digu, maitasunaren bidez. Bestalde, isil-isilik, Espiritu Santuak gidatzen du benetan gure bizitza, Jesusena gidatu zuen bezala, eta Bera presente egiten den eta interpelatzen digun garaien zeinuak interpretatzen jakitera eramaten gaitu.

3. Maitasunaren aginduaren bidez, (agindu) hori beteta bera gaurko munduan argi eta modu ulergarrian agertzen dela ikusarazten digu Kristok. Horrela jakingo dute nire jarraitzaileak zaretela: elkar maitatuta, nik maite izan zaituztedan bezala. Zatiketaz, gerraz, gorrotoz eta injustiziaz betetako mundu batean, anaitasunean agertzen da Jesus, hori ez baita gure ahaleginaren emaitza bakarrik. Aitaren dohaina da, Kristoren anai-arreba ez ezik, gure artean ere anai-arreba egiten gaituena. Maitasunean bat egitea da Espirituaren lehen fruitua. Mendekostean jaisten denean, fededunen komunitatea sortzen da. Jesusen bataioaren jaia anaitasuna eraikitzeko deia da, Kristo piztuaren presentzia eta indarra modu argi eta agerikoan erakusten duena.

### Jainkoaren herriaren otoitza

Senideok, dei egin diezaiogun bataioa hartuz gizakia berritu eta gure bataioa santutu nahi izan zuen Salbatzaileari:

*Erantzuna:* ℞. **Entzun Zuk, Kristo, herri honen oihua.**



En - tzun, Zuk Kris - to, he-ri ho - nen oi-hu - a.

—Kristok, Jainkoaren zerbitzariak, Aitaren maiteak maitasunez begira diezaien bataioa eta sendotza hartzeko prestatzen direnei, edo beraien haurrak prestatzen dituztenei. Egigun otoitz. ℞.

- Kristok, herri guztiak zuzentzeko Jainkoak Aukeratuak, Jainkoa bihotz zintzoz bilatzen dutenak argi ditzan, Aitaren ahotsa entzunarazi diezaien eta bataioko uretara zuzen ditzan. Egigun otoitz. *℟̄.*
- Kristok, Espirituak Gantzutuak, Aitaren asmoarekin leial izan zenak, eman diezaiela bere ametsak zailtasunez beteak ikusten dituzten etorkinei eta beren herritik urruti bizi direnei, ez etsitzeko adorea. Egigun otoitz. *℟̄.*
- Kristok, Seme maiteak, Jordanen bataioa hartu nahi izan zuenak, lagun diezagula bataioaren handitasuna eskertzen, Jainkoak gizakioi digun maitasunaren dohain denez. Egigun otoitz. *℟̄.*

Jainko errukitsua zure ahotsa entzunarazten duzu bataioko urtean eta sendotzako gantzutzean, entzun gure otoitzak eta emaezu bataiatu guztiei bataioko hitzak leial betez fedearen testigu ausart izatea. Jesu Kristo gure Jaunaren bitartez. *℟̄.* Amen.

### **Oparigaien gaineko otoitza**

Onartu, Jauna,  
zeure Seme maitearen agerraldia ospatzen dugun  
egun honetan ekarri ditugun dohainak;  
bihur daitezela munduko bekatua kendu duen  
zure Seme errukitsuaren sakrifizio.  
Errege bizi baita gizaldi eta gizaldietan. *℟̄.* Amen.

**Prefazioa: Jaunaren Bataiokoa.** (*Meza-liburua: 146. or.*)

### Jaunartze ondorengo otoitza

Jaun errukitsua,  
dohain santu hauez aserik apalik dei egiten dizugu:  
egin gaitzazu zeure Semearen hitzaren entzule zintzo,  
izenez eta izatez zure seme-alaba izan gaitezen.  
Jesu Kristo gure Jaunaren bitartez. *℟*. Amen.

### Herriaren gaineko otoitza eta bedeinkapena

Jauna zuekin. *℟*. Eta zure espirituarekin.

Makurtu burua Jaunaren bedeinkapena hartzeko.

*(Eskuak herriaren gain zabalik bedeinkapena esango du:)*

Entzun, Jauna, zeure familia honen otoitzak  
eta eman zeure kemena apalik eskean ari zaizunari,  
beharrezko baliabideez indarturik,  
zure izenaren aitormenean iraun dezan.

Jesu Kristo gure Jaunaren bitartez. *℟*. Amen.

Bedeinka zaitzatela Jainko ahalguztidunak:  
Aitak, eta Semeak, ✠ eta Espiritu Santuak. *℟*. Amen.

Zoazte Jaunaren bakean. *℟*. Eskerrak Jainkoari.

